



Xueves, 1 d'agostu del 2019

El Gobiernu d'Asturies apoya con 895.000 euros la integración nel mercáu llaboral de 710 persones con discapacidá severa

- Les subvenciones, empobinaes a empreses y centros especiales d'empléu, disponen de financiación del Fondu Social Européu y cubren parte de los costos salariales de los trayadores
- El Principáu recibe 304.000 euros del Executivu central pa impulsar cinco programes contra les drogodependencies

El Gobiernu d'Asturies aprobó güei un gastu de 895.000 euros pa la convocatoria d'una llinia de subvenciones destinada a sofitar la integración nel mercáu llaboral de 710 persones con discapacidá severa.

Estes ayudes, dirixíes a empreses y centros especiales d'empléu, tramítense en réxime de concurrencia competitiva, cubren parte de los costos salariales de los trayadores y cunten con financiamientu del Programa Operativu Fondu Social Européu (FSE), qu'apurra'l 80 % de los recursos (716.000 euros), y del Principáu, qu'abona'l 20 % restante (179.000).

La Estratexa Europea sobre Discapacidá 2010-2020 configura'l marcu d'actuación de la Unión Europea nesti ámbitu y sofita los esfuerzos de los Estaos miembros pa incorporar al mercáu de trabayu a persones discapacitades y con dificultades especiales d'inxertamientu.

La convocatoria d'ayudes va articulase al traviés de trés llinies empobinaes a estes entidaes:

- Centros especiales d'empléu constituyíos como empreses: 500.000 euros.
- Centros especiales d'empléu formaos por entidaes ensin ánimu d'arriquecimientu: 166.000 euros.
- Empreses mercantiles: 229.000 euros.

Por cada emplegáu discapacitáu va abonase mensualmente una ayuda del 10 % del salariu mínimu interprofesional (SMI) vixente nel periodu que cubre la subvención, que va del 10 de xunetu del 2018 al 30 de xunu





d'anguaño. Estes ayudes son complementaries a les que se conceden anualmente a persones con discapacidá contrataes en centros especiales d'emplegu.

Alcuerdu cola Delegación del Gobiernu pal Plan sobre Droga

L'Executivu autorizó la celebración d'un conveniu col Ministeriu del Interior, al traviés de la Delegación del Gobiernu pal Plan Nacional sobre droga, que va facilitar la llucha contra les drogodependencies a lo llargo d'anguaño.

En virtú del alcuerdu, el Principáu va recibir 304.000 euros con cargu a los presupuestos xenerales del Estáu del 2019, al traviés de creitos que provienen del fondu de bienes prindaos por tráficu de droga y otros delitos rrellacionaos. Esta partida va dexar desenvolver cinco programes:

- Tratamientu pa l'adicción a la cocaína y otros psicoestimulantes: 120.000 euros.
- Programa d'atención a persones con drogodependencia nos xulgaos de lo penal d'Asturies: 37.000 euros.
- Programa d'intervención sobre l'alcoholismu: 90.000 euros.
- Programa de pisos d'incorporación social: 50.000 euros.
- Programa Indro, d'información sobre droga: 7.000 euros.

Collaboración cola Universidá Camilo José Cela

La Consejería de Sanidá y la Universidá Camilo José Cela de Madrid van prorrogar hasta ochobre del 2020 el conveniu pal desenvolvimientu de programes de cooperación educativa que caltienen dende'l 2018.

Esti alcuerdu fai posible qu'estudiantes asturianos del grau d'Enfermería de la institución académica madrilana realicen práctiques profesionales tutelaes en centros sanitarios del Serviciu de Salú del Principáu (Sespa). D'esta manera, van tener la posibilidá de conocer el sistema sanitariu de la so comunidá y amenorgar costos por desplazamientos.